



Gabinete Wever - Croes II

ISLAONLINE

Noticia di Gobierno

2023

Diahuebs 20 April 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



PROME MINISTER TA FELICITA CUERPO POLICIAL CU EDIFICIO REMODELA NA PLAYA

Diahuebs atardi a tuma luga entregamento di yabi di Warda di Polis Playa. E edificio a wordo remodela y adapta specialmente pa Cuerpo Policial. Premier Evelyn Wever - Croes ta felicita Cuerpo Policial cu esaki y ta gradici Minister di Husticia Rocco Tjon cu a cumpli y haci esaki posibel.

Prome Minister Wever - Croes tabata presente cu Minister Tjon na ocasion di entrega di e yabi di Warda di Polis Oranjestad. Na e inauguracion por a mira con bunita e luga a keda y ta spera di curason cu tur agente policial y tur esnan cu ta labora eynan por sinti mas satisfaccion den nan trabou awo cu e ambiente ta asina positivo.

'Mi ta gradici tur esnan cu a haci esaki posibel incluyendo e desaroyadornan cu a realisa e proyecto den un tempo cortico, y Minister Tjon cu a asumi e reto y cumpli cu esaki cual ta hopi importante. Cuerpo policial a pasa varios aña den un edificio cu no tabata adecua y aworaki nan a haya un edificio cu nan merece', Promer Minister Wever - Croes a expresa.

Por ultimo, Prome Minister a remarca cu e ta importante pa un y tur realisa e sacrificianan grandi cu ta haciendo pa purba acomoda tur trahado cu ta traha pa gobierno reconociendo cu bienestar di e trahado ta cuminsa na pia di trabou.





POTRETNAN:
PROME MINISTER
TA FELICITA CUERPO
POLICIAL
CU EDIFICIO REMODELA
NA PLAYA





A DUNA INFORMACION DI E VISION DI INNOVACION DI GOBIERNO NA E COMISION DI PARLAMENTO

"e-Government ta e proyecto pa digitalisa e procesonan di Gobierno pa asina e ciudadano no mester bay diferente caminda pa haya documentonan mas y lo facilita esaki via computer of na un bali so haya tur loke cu tin mester. Cu esaki, procesonan den gobierno lo bira mas eficiente y transparente pa duna miho servicio na nos comunidad. Nos ta aprecia cu Parlamento tin hopi interes den e topico aki".

Prome Minister
Evelyn Wever-Croes




PROYECTO DI PORT CITY

Proyecto di Port City lo tin un impacto positivo riba economia di pais Aruba. E meta di Gobierno di Aruba ta pa crea progreso y bienestar general pa nos pais y pa logra esaki nos mester desaroya nos economia.

Prome Minister
Evelyn Wever-Croes





Xiomara Maduro
MINISTER



MINISTER MADURO TABATA PRESENTE NA E BUSINESS EVENT DI ARUBA PORTS AUTHORITY NV PA CERA CONOCI CU DETAYENAN DI PORT CITY ARUBA

Minister Maduro di Finansa y Cultura tabata presente na e Business Event di Aruba Ports Authority APA pa asina haya sa mas di e dos proyectonan cu APA ta preparando cual ta e desaroyo urbano di Port City Aruba na Oranjestad y e zona logistico na Barcadera. Esakinan ta dos proyecto cu sigur lo duna un empuhe na economia di Aruba. Port City Aruba lo yuda mehora e producto turistico, specialmente e turismo crucero.

E proyecto lo crea un experiencia nobo pa nos bishitantenan y nos localnan.

Minister Maduro ta felicita Minister di Turismo, Dangui Oduber, e team di APA, Departamento Economico y tur persona y instancia cu ta duna un aporte pa realisa e bunita proyectonan aki na bienestar di nos Pais.



Comision Celebracion Dianan Nacional ta informa: **TAYER DI FLI EXITOSO CU HOPI INFORMACION BALIOSO**

Diaranson atardi Comision Celebracion Dianan Nacional, Ministerio di Cultura y Biblioteca Nacional a organisa un tayer pa muchanan siña traha fli. E meta di e tayer ta pa motiva nos muchanan pa sigui cu e bunita tradicion di hisamento di fli cu Ministerio di Cultura kier sigui apoya.

E tayer tabata bon atendi cu 55 hoben cu a haya un demostracion con nan por traha nan propio fli. E tayer a wordo duna pa sr. Julio Werleman kende tin mas di 50 aña trahando fli.

Hunto cu su asistente sra. Jarienne Dijkhoff, nan a percura pa presenta e tayer y duna e muchanan tur informacion con ta traha fli.

Entrante diabierna 21 april tur fli cu a wordo traha lo ta den un exposicion na Biblioteca Nacional na George Madurostraat,

durante orario di servicio publico. E exposicion aki lo keda te cu diamars 25 di april. Despues di e fecha aki muchanan ta haya nan fli pa subi riba Dia di Rey.

Un gradicimento special ta bay na sra. Astrid Britten directora di Biblioteca Nacional Aruba, como tambe empleado di biblioteca sra. Glenda Zavala pa coordina e tayer.

Danki na sr. Julio Werleman, tambe su asistente, cu a siña e muchanan con ta traha fli y tambe a conta e muchanan un poco di e tradicion di hisamento di fli.

Na final di e tayer Minister di Cultura sra. Xiomara Maduro hunto cu directora di Biblioteca Nacional sra. Astrid Britten a haci entrega di certificado na tur muchanan cu a participa.





POTRETNAN
TAYER DI FLIE





POTRETNAN
TAYER DI FLIE





Fundacion Kapel di Bethania (FKB) hunto cu Pastoral Hubenil Aruba (PHA) ta ofrece un evento pa henter famia den e bario di Noord. Pueblo di Aruba ta invita pa bin celebra Dia di Rey na 'Klooster Imeldahof', cuminsando for di 10'or di mainta pa 4:30 di atardi.

Esaki lo ta un evento cu weganan tradicional, recreativo y educativo pa grandi y chikito, lo tin entretenimento, cos di come y bebe pa pasa un dushi dia den ambiente familiar.

Pa participa na e weganan ta ofrece publico un carchi di actividad pa solamente Afl. 10,- cu cual por participa na e diferente station di entre otro weganan popular den grupo y individual.

E fondo recauda cu e carchi aki lo ta pa e hobennan di Pastoral Hubenil Aruba (PHA) cu ta den preparacion pa bay representa Aruba na Portugal durante e Hornada Mundial Hubenil 2023 (World Youth Day).

Cu e carchi di actividad aki na final di atardi lo por gana premionan atractivo pa henter famia. Danki na nos bon comerciantenan cu a sa di sostene nos hobennan.

Tambe lo por disfruta di contamento di storia y poppenkast door di señor Richard Dabian. Un obra theatral di e storia di "Compa Nanzy" duna pa señora Lila Richardson. Presentacion di diferente grupo di scol di musica manera scol di harpa y scolnan di baile.

Muchanan hunto cu nan mayornan por pasa den e area di workshop duna door di hoben artista Alyssa Singh y asina traha hunto un bunita obra pa hiba cas. Tambe lo por saca un bunita protet familiar como recuerdo di e dia na nos "Photobooth". Hunga na diferente weganan rond, y sin lubida di tira un bista na nos gran vlooienmarkt.



Naturalmente e dia aki lo por pasa bishita Kapel di Bethania, cu ta un kapel original y unico na Aruba. Haya mas informacion di e souernan cu a biba den e Klooster y tur kico nan a hasi pa e Parokia di Noord, den e exposicion 'Historia di Parokia di Noord'.

Mester anuncia cu e edificio monumental aki ta celebrando su 65 aniversario di existencia y 65 aña di bendicionamento di Kapel di Bethania.

E actividad aki na "Klooster Imeldahof" ta enfoka riba e experiencia di participacion y no riba competencia. Peseymes e entrada ta completamente gratis.

FKB y PHA ta gradisi comerciantenan di Aruba cu a copera, Comision Dianan Nacional, IBISA, nos Minister di Cultura sra. Xiomara Maduro y tambe tur voluntarionan pa nan cooperacion, sosten y ayudo pa por realisa e evento aki.

Pueblo di Aruba, yega Noord y haya sa mas di nos historia y contribui cu nos hobenan di PHA pa nan logra nan meta pa Hornada Mundial Hubenil 2023.



SCOL BASICO MARIA SCHOOL TA REPRESENTA ARUBA DEN E DEPORTE DI VOLLEYBALL DEN WEGANAN INTERINSULAR 2023

Aruba ta den pleno preparacion pa Weganan Interinsular 2023 cu ta tumando luga despues di shete aña na nos dushi isla. E campeonato tan anhela entre e scolnan di Aruba, Boneiro y Curaçao ta tuma luga e weekend aki.

Aruba ta competiando cu dos scol den e deporte volleyball di mucha homber den Weganan Interinsular 2023. Un di e scolnan basico ta Maria School.

E hungadonan cu ta forma parti di ekipo di Maria School ta: Christopher Angela, Elijah Blijden, Ebrion Dirksz, Sherdion Dirksz, Jaden Flanegin, Davion Franken, Djorick van der Linden, Jaden Maduro, Guivan Monart y Rijair Thompson.

Entrenado di e ekipo di volleyball, Sra. Tamara Malmberg - Hamlet y coach asistente, Sr. Franklin Adames.

Minister Endy Croes ta invita comunidad di Aruba pa bin apoya y duna sosten na e hobennan cu ta competi pa logra conquista e titulo maximo den Weganan Interinsular 2023. Cu deseo, disciplina, dedicacion y determinacion boso ta logra. Hopi exito!

PROGRAMA DI WEGANAN INTERINSULAR 2023:

DIA 21 DI APRIL:

2:30pm-3:50pm

(C.D. Frans Figaroa)

APERTURA DIA 21 DI APRIL:

5:30pm

(Parke Curason na Jaburibari)

DIA 22 DI APRIL:

8:30am -11:40am

(C.D. Frans Figaroa)





SCOL BASICO SAGRADO CURASON TA UN DI E EKIPONAN CU TA REPRESENTANDO ARUBA DEN WEGANAN INTERINSULAR 2023

**Gran apertura diabierna 21 di april na
Cruyff Court Denzel Dumfries, Parke Curason Jaburibari.**

Despues di shete aña Weganan Interinsular entre scolnan di Aruba, Boneiro y Curaçao ta tumando luga bek. Clausura di Weganan Interinsular 2023 ta tuma luga na Aruba e weekend aki, dia 21 y 22 di april.

Ministerio di Deporte hunto cu IBISA ta encarga pa e evento aki y lo prepara un show bunita pa e pueblo di Aruba y pa nos bishitantenan di Curaçao y Boneiro cu lo ta presente pa e clausura di Weganan Interinsular 2023.

Aruba tin dos ekipo di volleyball di mucha homber cu ta competi den Weganan Interinsular 2023.

SCHEDULE DI WEGANAN INTERINSULAR 2023:

DIA 21 DI APRIL:

2:30pm-3:50pm (C.D. Frans Figaroa)

APERTURA DIA 21 DI APRIL:

5:30pm (Parke Curason na Jaburibari)

DIA 22 DI APRIL:

8:30am -11:40am (C.D. Frans Figaroa)



Un di e ekiponan ta scol Colegio Sagrado Curason. Cera conoci cu e hungadonan; Naivmar Angela, Cyler Arends, Zayden Arends, Roma Bisslik, Dilan Herazo, Naeson Franco, Javan de Kort, Lucas Kelly, Brandon de Leça y Haguen Orman.

Entrenado di Volleyball, Sr. Elmerlindo Robles de Medina y coach asistente di volleyball, Sr. Gregory de la Cruz. Acompañante di delegacion di Aruba: Sr. Frederick Kelly y Sr. Carlos Orman

Minister Endy Croes ta invita comunidad di Aruba pa bin apoya y duna sosten na e hobennan cu ta competi den Weganan Interinsular 2023. Cu boso deseo, disciplina, dedicacion y determinacion boso ta logra. Hopi exito!



@ibisaaruba



Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! _____